

UBURYO BWO GUSHYIRA KURI GAHUNDA URUGAGA RW'ABATO

Abana bacu ni umutungo ukomeye itorero rifite. Ni yo mpamvu nk'itorero, dufite inshingano ikomeye yo gutegurira abana bacu gahunda ziberanye n'igihe bagezemo ndetse n'imyaka bafite. Turifuza ko bagira imico, intekerezo, amarangamutima n'imyitwarire myiza. Umunyabwenge yaranditse ati: “Menyereza umwana inzira akwiriye kunyuramo, azarinda asaza atarayivamo” (*Imigani 22:6*). Uyu ni wo mugambi nyamukuru w'Urugaga rw'abato. — ***Umuyoboro w'amasomo yigwa mu mitwe y'amajyambere y'abato n'abarondabukanda, p.6.***

Abantu benshi bajya batekereza ko abana ari ab'ahazaza gusa. Ariko, nubwo imbaraga zabo zaba zizakenerwa ahazaza, zigomba gutegurwa hakiri kare. Ni yo mpamvu abanyarwanda bavuga ngo: “Igiti kigororwa kikiri gito”. Kugira ngo tugire ahazaza heza, tugomba gushyira imbaraga zacu uyu munsu mu kwita ku bana bakiri bato kuko ari bo bayobozi b'ejo hazaza.

Abana ni bo butunzi bwacu kuruta imitungo yacu. Ibyo dutunze bishobora gushira, ariko icyo wubatse mu mwana kizima arakirambana kikamubamo ubuzima bwe bwose. Mu mibereho ye yose, umwana akwiye kwigishwa ***ubupfura, ubunyangamugayo, kwirinda, gutera umugongo ibibi, kubaha, guca bugufi, urukundo, ubugwaneza, amahoro, ibyishimo*** n'ibindi byiza byose bikomoka ku Mana —***Uzuza imibereho yawe ibyishimo, p.3.***

Mbere yo gushyira kuri gahunda abana babarizwa mu rugaga rw'abato, ni ngombwa kubanza kumenya ibyiciro babarizwamo n'ibyo bakunda hakurikijwe ikigero k'imyaka barimo.

Kuva ku myaka 0-3: Ni abana bakeneye kwitabwaho cyane. Akenshi ibyo bashaka babigaragaza barira. Bakeneye kunanurwa igihe bavuye mu mugongo, bagasimbizwa kuko bibamara impungenge.

Kumwereka ikerekezo aganamo bimuhumura ubwenge, kumusubirishamo amagambo bituma amenya kuvuga. Kumwereka no gukora ku cyo umwigisha ni byo bimunyura.

Kuva ku myaka 4-6: Aba bana ni abanyamwete. Bakunda gusabana, bagira imbaraga, nyamara baruha vuba kandi bashobora guhura n'impanuka nyinshi.

Aba bana baba bakeneye kwitabwaho cyane kandi bakigishwa bihagije kuko bafata vuba ariko ibirambirana ntibabyemera. Kwiga bakora ni byo bishimira kuruta kwicara hamwe.

Kuva ku myaka 6-9: Aba bana banezezwa no kwisanisha n'ababaruta, ukumva umwe yiyita papa cyangwa mama. Bakunda gusimbuka urukiramende, korora, gutera ibiti, kuvumbura n'ibyuma by'umuziki. Iterambere ryabo rigaragarira aha. Banga ubavundira mu myitozo yabo, bityo kubigisha bigasaba guca bugufi kugira ngo bakwibonemo nk'inshuti yabo magara. Bityo rero, kubayobora, kubigisha no kubatoza birabanezeza.

Aba bana bose bakeneye kwigira ibyigisho bitandukanye mu kiciro cy'urubyiruko rw'Abadiventiste b'umunsi wa karindwi (J.A), kuko ari ho babonera ibyo bakeneye bijyanye n'ibyifuzo byabo ariko by'umwihariko batozwa kubaha Imana no gukurira muri Kristo. Ibi byigisho biga, byashyizweho hashingiwe ku nama ziri mu gitabo cy'Uburezi no mu mabwiriza ya Bibiliya. Ibyo byigisho bikubiye mu mitwe y'amajyambere ikurikira: **Udutama duto** (imyaka 4), **Abadacogora** (imyaka 5), **Abanyamuhati** (imyaka 6), **Abatwaramucyo** (imyaka 7), **Abubatsi** (imyaka 8) n'**Abafasha** (imyaka 9). Kugira ngo babe bateguwe neza bagomba gutegurwa mu by'umubiri, ubwenge n'iby'Umwuka. (*Education, p.13*).

Babyeyi rero, ni ahanyu mu kuzana abana banyu muri iki kiciro aho bahabwa n'abafite ububasha n'ubushobozi bwo kubitaho, ubumenyi ndetse n'uburere butandukanye.

Uwiteka akomeze kubarindira impagarike n'ubugingo!